


www.BibleForChildren.org


मत्ती 26



यीशु फसह हाब्ब
इन आर दिन पयले
बैतनिय्याह दा बंदुन यल
लाज़र ईरोन, यारी यीशु
सोत्तुर दा टु जित्ता माळीदुन.
आग मरियम जटामांसी इन आर्धा
लीटर किमती शुद्ध अत्तर तनकु
यीशु उन कालगोळ मा
हाकदुर, अदिक तान चुट्टीगोळ
देल आऊन काल सिटदुर; अदिक
अत्तर इन वास देल सप्पा
मान्ना सुगन्धित आगेत.



आग यहूदा इस्करियोती जो हन्नेळ चेलागोळ दा टु ऊंद ईरोन,
प्रधान याजकगोळ हात्ती होदुन कि यीशु उक आंदुर्द कय देल
हुळसुसकु आंदरी सौप्स बुळुल.
आंदुर ईद केळकु खुश आदुर,
अदिक आऊक पैस्या कोळोद
स्वीकार माळदुर; अदिक आव
मवका नोळोन कि आऊक
ह्यांगारा भी प्रकार देल
हुळसुसकु आंदुर्द कय
दा सौप्स बुळुल.



इदुरसाटी चेलागोळ यीशु उन आग्या
स्वीकार माळदुर अदिक फसह तयार
माळदुर. “याग आंदुर ऊमोर रा यीशु रोटी
ताकोंडुन, अदिक आशीष बेळकु मुरदुन, अदिक
चेलागोळी कोटकु अंदुन, हुडी, तिनी; ईद नांद
मय हुन.” बाक यीशु कटोरा हुळकु धन्यवाद
माळदुन, अदिक आंदरी कोटकु अंदुन,
“नीव सप्पा लाँकुर इदुर दा टु कुडी,
यतिकी ईद वाचा अन्द नान अद
रक्ता हुन, जो सप्पा
लाँकुर पापगोळ
माफ अन्द साटी
वाहुसकु आगतद.”



“शमौन, हे शमौन! शैतान नीम लाँकुरी परखुसोर साटी आग्या बेळ कोंडान कि बेकार दा टु वळलेर इक अलग माळुल ह्यांग केईवाळा गोदी दा टु फरकंडा अलग माळतान, लेकीन ना नीन साठी विनती माळदीन कि नीन विश्वास गोर्त आगबाळुल; अदिक याग नी वापस बंद्या, रा तान वार्टुर इक हिम्मत कोळेत.” पतरस यीशु से अंदुन, “हे प्रभु, ना नीन सांगुळ बंदीगृह दा होगली, अदिक सायली भी तयार आईन.” यीशु अंदुन,

“हे पतरस, ना नीन से अनतीन कि ईद हुंज कुग्गतिदील आगासताका नी मुर घन नांद इनकार माळ कोंड्या कि नी नानी जान्साल.”



आग यीशु तान चेलागोळद सांगुळ
गतसमनी हेसुर इन ऊंद जागा
दा बंदुन अदिक तान चेलागोळ
से अनली कुरतुन, “ईल्या
कुर्तकु ईरेतीर, आगासताका ना
अल होगकु प्रार्थना माळतीन.”
अदिक अंदुन, “हे बाबा, हे
आप्पा, नीन से सप्पा येनारा आग
सकतद; ईद दुख इन कटोरा अक
नान हाती टु हटुसबुळ: तौभी ह्यांग
ना चाहासतीन हांग ईला, पर जो
नी चाहासत्या अदा आगुल.”



आग यहूदा, सैनिकगोळद ऊंद दल इक अदिक प्रधान याजकगोळी
अदिक फरीसीगोळ दी टु चौकीदारगोळी हुळकु, कंदीलगोळ,
मशालगोळी अदिक हथियारगोळी हुळकु अल बंदुन.
अदिक आंदुर दा टु ऊंद मंळसा महायाजक ऊंद
दास मा तलवार नळसकु आऊन ऊम्मा किव
हार्स बुट्टुन. इदुर मा यीशु अंदुन,
“ईग बस माळी.” अदिक आऊन
किव इक मुटकु आऊक
वळलीद माळदुन.




बाक आंदुर यीशु उक हुडुकु ओतुर, अदिक महायाजक उन मान्या
तंदुर. पतरस दुर दुर टु उच आऊन हिंद-हिंद नळुतोगोन;
अदिक याग आंदुर आंगुळ दा बेक्की
होत्ताकु ऊंद ऊज्या कुरतुर,
रा पतरस भी आंदुर
न्याड्या दा कुरतोदुन.




महायाजक उन दासगोळ दा
टु ऊंद, जो परिवार दा टु ईरोन
यार्द किव पतरस कोद
बुटीदुन, अंदुन, “येन ना नीनी
आऊन सांगुळ बेली दा ईला
नोळीदिन?” पतरस मात्त
इनकार माळदुन, अदिक तुरन्त
हुंज कुगत. अदिक आव व्हार्या
होटकु हुदक्या कोट कोटकु वर्लदुन.




आग सप्पा सभा यदकु यीशु उक पिलातुस उन
हात्ती ओतुर. पिलातुस यीशु उक केळदुन,
“येन नी यहूदीगोळद राजा हुय?” यीशु
आऊक उत्तर कोट्टुन, “नी खुद अच अनेत्या.”
लेकीन पिलातुस यीशु उक
बिळोद इच्छा देल लांकुरी
मात्त समजुसदुन, लेकीन आंदुर
मात्त चिल्लास्कु अंदुर,
“आऊक कूस मा येर्स, कूस मा!”




आग पिलातुस यीशु उक आंदुर कय दा कोट
बुटुन ताकी आव क्रूस मा येर्सकु आगुल.
इदुरसाटी आंदुर आऊक तान कबजा दा
माळदुर. आग आंदुर यीशु उक ओतुर, अदिक
आव तान क्रूस नेगुकु आ जागा ताका व्हार्या
होदुन, जो “खोपळी इन जागा” अनकु आगतद
अदिक इब्रानी भाषा दा “गुलगुता.”



अल आंदुर आऊक अदिक आऊन सांगुळ
अदिक येहू मंळसागोळी क्रूस मा येर्सदुर,
ऊंद इक इत्त अदिक ऊंद इक आत्त, अदिक
न्याड्या दा यीशु उक.



अदिक सुर्य अन्द उजुळ होगत ईत्त, अदिक मंदिर इन परदा न्याड्या
दा टु हरदोत, अदिक यीशु धोळद आवाज देल कारूकु अंदुन,
“हे आप्प, ना तान आत्मा नीन कय दा सौप्सतीन.”
अदिक ईद अंदकु सोतोदुन.



अरिमतिया नव ईरावाळा यूसुफ बंदुन, जो
महासभा दव सदस्य ईरोन अदिक तावा
परमेश्वर उन राज्य अन्द हादी
कायोन. आव हिम्मत माळकु
पिलातुस उन हात्ती होगकु
यीशु उन लाश बेळदुन.
आग आव मलमल इन
ऊंद चादर कोंडुन,
अदिक लाश इक

ईळसकु आ चादर दा
गुंळसदुन, अदिक ऊंद
कब्र दा जो चट्टान दा
अगुळकु आगीत ईटदुन, अदिक
कब्र अन्द दरवाजा
मा ऊंद कल्ल ढकलुसदुन.



दुसरा दिशी जो तयारी इन दिन इन बाद इन
दिन ईरोद, प्रधान याजकगोळ
अदिक फरीसीगोळ पिलातुस
उन हात्ती जमा आगकु अंदुर,
“हे स्वामी, नामी याद आद
कि आ भरमुसावाळा याग
आव जित्ता ईरोन,
अंदिदुन, . . .”



“... ‘ना मुर दिन इन बाद्दा जित्ता आगाईन.’
इदुरसाटी आंदुर पहेरेदारगोळी
सांगुळ ओतुर, अदिक कल्ल
मा मोहर हचकु कब्र अन्द
रखवाली माळदुर.”




आराम इन दिन इन बाद्दा हप्ता अन्द पयला
दिन व्हातुर आगतेला अच मरियम
मगदलीनी अदिक दुसरा मरियम
कब्र अक नोळली बंदुर. अदिक
नोळी, ऊंद हापाळ अच भारी
भूकम्प आत, यतिकी
परमेश्वर उन ऊंद
स्वर्गदूत स्वर्ग टु ईळुकु
बंदुन अदिक आव

कल्ल इक


अलग ढकलुस्कु
अदुर मा कुरतुन.
आऊन अंजक देल पहरेदार
नळगली कुरतुर, अदिक
सोत्तुर घाई आगेदुर.




स्वर्गदूत आ येहू आर्तेर से अंदुर, “अंजबाळी
ना जान्सतीन कि नीव यीशु उक जो
कूस मा येर्सकु आगीदुन आऊक
ढुंढसेतीर. आव ईल हैलेच,
तान वचन इन अनुसार
जित्ता आग्यान. बरी,
आ जागा अक नोळी
यल प्रभु बिदकु ईरोन.”



इदुर मा आंदुर अंज्क अदिक बळा खुशी इन सांगुळ
तुरन्त कब्र टु वापस आगकु अदिक चेलागोळी
इक ईद समाचार कोळोर साटी
वोळली कुरतुर. आग यीशु आंदरी
सिकदुन. अदिक अंदुन, "सलाम."
आंदुर हात्ती बंदकु अदिक आऊन
नव काल हुळकु प्रणाम माळदुर.





यीशु आ हनुन चेलागोळी भी कांळसदुन, याग आंदुर ऊमली कुर्तीदुर,
कांळसदुन, अदिक आंदुर्द अविश्वास अदिक मन इन कठोरता मा आंदरी
दनकुसदुन, यतिकी यार आऊंद जित्ता आगदुर बाद्दा आऊक नोळीदुर,
आंदुर आऊंद विश्वास माळीदिल.

प्रभु यीशु आंदुर से माताळदुर बाद्दा दा स्वर्ग मा नेगुकु आदुन, अदिक
परमेश्वर उन ऊम्मा कय दी कुरतुन.



यतिकी परमेश्वर दुनिया से हिँग प्यार ईटदुन कि
आव तान ऊंद ठैसा पार कोट बुट्टुन, ताकी जो
यावारा आऊन मा विश्वास माळयान आऊन
नाश आगबाळुल, लेकीन आऊक अनन्त
जीवन सिकुल.



रोमियों 3:23

इदुरसाटी कि सप्पा मुंदुर पाप माळ्यार अदिक परमेश्वर उन महिमा देल
हापाळ दुर आर,

रोमियों 6:23

यतिकी पाप इन मजदूरी रा मृत्यु आद, लेकीन नाम परमेश्वर उन अनुग्रह
अन भेंट नाम प्रभु मसीह यीशु दा अनन्त जीवन आद.

इब्रानिगोळ 9:27

अदिक ह्यांग मंळसागोळ साटी ऊंद घन सायोद अदिक अदुर बाद्दा परमेश्वर
उन द्वारा न्याय इन आगोद तय आद,



इफिसिगोळ 2:8,9

यतिकी विश्वास इन भेंट इन द्वारा अनुग्रह देल अच नीम्द उद्धार आत, अदिक ईद नीम्द दी टु ईला, बल्की परमेश्वर उन दान हुन, अदिक ना कर्मगोळद कारण, हिंंग आगबाळुल कि यावारा घमण्ड माळुल.

रोमियों 10:9,10

कि अगर नी तान बाय देल यीशु उक प्रभु जान्सकु अंगीकार माळया, अदिक तान मन देल विश्वास माळया कि परमेश्वर आऊक सोत्तुर दा टु जित्ता माळदुन, रा नीन जरूर उद्धार आदीत. यतिकी विश्वास माळदुर देल नाव परमेश्वर उन सांगुळ सही संबंध दा बरतेव अदिक बाय देल कबुल माळदुर देल नामी मुक्ति सिकतद.



यूहन्ना 3:16,17

“यतिकी परमेश्वर दुनिया से हिं ग प्यार ईटदुन कि आव तान ऊंद ठैसा पार कोट बुट्टुन, ताकी जो यावारा आऊन मा विश्वास माळयान आऊन नाश आगबाळुल, लेकीन आऊक अनन्त जीवन सिकुल. परमेश्वर तान पार उक दुनिया दा इदुरसाटी कळीदिल कि दुनिया मा दण्ड इन आग्या कोळुल, लेकीन इदुरसाटी कळयान कि दुनिया अक आऊन द्वारा उद्धार सिकुल.

1 यूहन्ना 5:11-13

अदिक अद गवाही ईद हुन कि परमेश्वर नामी अनन्त जीवन कोटान, अदिक ईद जीवन आऊन पार उन दा आद. यार हात्ती पार आन, आऊन हात्ती जीवन आद, अदिक यार हात्ती परमेश्वर उन पार हैलेच, आऊन हात्ती जीवन भी हैलेच. ना नीमी, जो परमेश्वर उन पार उन हेसुर मा विश्वास माळतीर, इदुरसाटी लिखसतीन कि नीव अर्त कोमी कि अनन्त जीवन नीम्द आद.



मत्ती 26-28; लूका 22-24; यूहन्ना 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Holiya Bible (hoy) © The Word for the World International
and Holiya Translation Samithi,
Kudwa, Gondia, Maharashtra 2025

<https://www.bible.com/en-GB/bible/2782/MAT.1.HAA25>

©2026 Bible for Children, Inc.

www.M1914.org

www.bibleforchildren.org

